


SECZIUN DA CATSCHADURS TÖDI / TRUN

STATUTAS



Statutas dalla Secziun da catschadurs

Tödi / Trun

commembra dall'Uniun cantunala da catschadurs da patentata (BKPJV) e commembra dil District da catscha 1 Cadi.

Scursaniziuns valeivlas per nossas statutas:

SCT	Secziun da catschadurs Tödi
UCCP	Uniun cantunala da catschadurs da patentata dil Grischun
DCC	District da catscha 1 Cadi
Egualitad dallas schlatteinas	En las suandontas determinaziuns dallas statutas vegn desistiu en favur d'ina legibladad pli semplia sin la fuorma feminina. Secapescha ch'ellas serefereschon adina era alla persuna feminina.

I. Num e domicil

Art. 1

Num	Sut il num Secziun da catschadurs Tödi exista tenor il cudisch civil svizzer art. 60 ff. ina secziun da catschadurs dalla vischnaunca da Trun.
Domicil	Il domicil dalla Secziun da catschadurs Tödi ei Trun . La secziun ei integrada ell'Uniun cantunala da catschadurs da patentata ed el District da catscha 1 Cadi.
Fundaziun	La Secziun da catschadurs Tödi ei vegnida fundada ils 25 da fenadur 1931 . Las indicaziuns davart las personas e lur funcziuns ellas statutas dalla Secziun da catschadurs Tödi serefereschon da principi ad omisduas schlatteinas, aschilunsch ch'ei seresulta buca enzatgei auter ord il senn dallas statutas.

II. Intent e finamira

Art. 2

Intent

La Secziun da catschadurs Tödi ha la finamira da formar ses commembers e promover in bien spért cun tgirar ils interess dils catschadurs:

- a) Entras mantener la basa per ina biala e sauna catscha da patenta en nies cantun.
- b) Entras ina buna tgira e bien quitau per ils animals selvadis, en special cun defender e promover igl ambient dil spazi vital per nossas selvaschinas.
- c) Entras esser commembra dall'Uniun cantunala da catschadurs da patenta cun renconuscher lezzas statutas e lezs reglaments.
- d) Entras perseguitar e sedar giu spirontamein cun fatgs da catscha.

III. Commembers, dretgs ed obligaziuns

Art. 3

Appartenenza

Alla Secziun da catschadurs Tödi appartegnan da principi catschadurs cun domicil ella vischnaunca da Trun.

Catschadurs senza domicil ella vischnaunca da Trun san era daventar commembers dalla SCT.

Commembers

La Secziun da catschadurs Tödi secumpona da

Commembers A

Commembers B

Commembers libers

Candidats da catscha

Commembers passivs

Commember A

Commember A sa mo quel daventar che posseda il dretg d'exequir la catscha el cantun Grischun. Leutier s'auda era la survegionza da catscha.

- Dretgs** Mintga commember A ha il dretg da:
- far propostas
 - votar
 - vegnir eligius
 - seprofitar d'acziuns dalla UCCP
 - Separticipar a scadina occurrenza organisada dalla SCT
- Obligaziuns** Mintga commember A ei obligaus da:
- assister alla radunonza generala
 - vegnir suenter allas obligaziuns finanzialas viers la SCT
 - segidar tenor meglier saver e puder en tuttas spartas organisatoricas
 - segidar tenor basegns vid la tgira da biotop
- Commember B** Commember B ei quel che figurescha gia en in'otra secziun sco commember A. Sco commember B ha el buca il dretg da vuschar e da vegnir eligius en fatgs dalla UCCP ni dil DCC. En fatgs interns dalla Secziun da catschadurs Tödi eis el legitimus da vuschar, sa denton buca vegnir eligius en la sup-rastonza dalla SCT.
- Commember liber** Commember liber daventan talas persunas che cumplenschan egl onn current il 75avel onn, ein stadas zacu a catscha ed ein duront ils davos 25 onns stadas nuninterruttamein commember A d'ina secziun dalla UCCP. Els ein libers dallas contribuziuns, possedan denton tuts dretgs e tuttas obligaziuns sco commember A.
- Candidat da catscha** Persunas che ein s'annunziadas el cantun Grischun per absolver igl examen da catscha, san vegnir recepidas en ina secziun sco candidats da catscha. Els han negin dretg da vuschar e da vegnir eligi en fatgs dalla UCCP e dil DCC. La secziun paga negina contribuziun per els alla UCCP. En fatgs interns dalla Secziun da catschadurs Tödi han els il dretg da vuschar, san denton buca vegnir eligi en sup-rastonza. **Candidats da catscha pagan negina contribuziun annuala.**
- Dretg da vuschar** En fatgs interns dalla SCT han commembers **A / B / commember liber / candidat da catscha** il dretg da vuschar.

Midada da commembradi	Aschigleiti ch'in candidat ha contonschiu il dretg dad ir a catscha, daventa el automaticamein commember A.
Commember passiv	Commember passiv sa mintga persuna daventar, denton mo talas che han negin dretg d'exequir la catscha. Mintga commember passiv paga sez la gasetta da catschadurs dil GR.
Dretgs	Commembers passivs han il dretg da: <ul style="list-style-type: none"> - assister allas radunonzas cun vusch consultativa - separticipar a tuttas occurrenzas dalla SCT - segidar vid la tgira da biotop sco era vid autras spartas organisatoricas dalla SCT - commembers passivs han negin dretg da vuschar
Obligaziuns	Mintga commember passiv ei obligaus da: <ul style="list-style-type: none"> - pagar la contribuziun annuala - sustener e star en per ils dretgs dils catschadurs

Art.4

Recepziun da commembers	La damonda da daventar commember dalla Secziun da catschadurs Tödi ei da drizzar en scret al president cun indiar las persunalias. Sur dalla recepziun definitiva decida la SCT da radunonza generala entras scrutini. Recepziun ei quel che contonscha igl absolut pli dallas vuschs dils commembers presents cun dretg da vuschar. A caschun dalla recepziun vegn surdau a mintga commember in exemplar dallas statutas.
Refusada da commembers	Ina refusada dil commembradi sto vegnir communicada per brev recumandada al pertuccau enteifer 10 dis sunter la radunonza generala.
Dretg da recuors	Encunter in'eventuala refusada dil commembradi A sa vegnir fatg recuors a scret enteifer 30 dis tier la suprastanza centrala dalla UCCP. Quella decida definitivamein en caussa.

Art. 5

Extrada da commembers

In'extrada ord la SCT ei da drizzar a scret al president sil pli tard avon l'entschatta dalla radunonza generala. Commembers dalla suprastanza ni funcziunaris han d'inoltrar lur abdicaziun a scret al president sil pli tard **quater jamnas** avon la radunonza generala.

Cun l'extrada sco commember piarda quel tuts dretgs visavi la SCT sco era vid lezza facultad. Per igl onn da fatschenta eis el denton aunc obligaus finanzialmein visavi la SCT.

Art.6

Exclusiun da commembers

Scadin commember dalla SCT che

- cunterfa als interess dalla SCT ni dalla UCCP
- ademplescha buca las obligaziuns statutaricas
- piarda il dretg dad ir a catscha
- vegn truaus pervia da surpassaments pesonts encunter il dretg da catscha

sa vegnir sclaus a caschun dalla radunonza generala ord la SCT entras scrutini sch' igl absolut pli dils commembers presents cun dretg da vuschar ein persunter ni entras la suprastanza centrala dalla UCCP.

Motivaziuns per in' exclusiun d'in commember

- san vegnir inoltratadas da scadin commember cul dretg da vuschar en fatgs dalla SCT a scret alla suprastanza entochen 10 dis avon la radunonza generala
- succedan sin proposta dalla suprastanza

Eventuals motivs per in' exclusiun san esser:

In'exclusiun dil dretg dad ir a catscha muort in surpassament pesont encunter il dretg da catscha munta buca automaticamein in'exclusiun ni interrupziun dil commembradi dalla secziun.

In'exclusiun ei da comunicar a scret per brev recumandada al pertuccau enteifer 10 dis suenter la radunonza generala.

Encunter in'exclusiun sa il pertuccau recuorer a scret enteifer 30 dis tier la suprastonza centrala dalla UCCP. Quella decida definitivamein.

IV. Undrientschas

Art.7

Commember d'honor

Commember d'honor sa ina persuna ch'ei sefatga grondamein meriteivla per la SCT vegnir numnada entras la radunonza generala. Leutier drova ei igl absolut pli dallas vuschs dils presents cun dretg da vuschar. La nominaziun sco commember d'honor vegn fatga entras la radunonza generala sin proposta dalla suprastonza.

- Gronds merets acquista enzatgi, sche sia prestaziun per caussas dalla SCT, dalla UCCP ni dil DCC ei extraordinaria.
- Commembers d'honor gaudan tut ils dretgs da commember.
- Commembers d'honor ein dispensai dalla contribuziun da commembradi.
- Els dueian vegnir undrai entras la surdada d'in present.

Commember liber

Commember liber d'avein talas personas che compleneschan egl onn current il 75 avel anniversari, ein stadas zacu a catscha ed ein duront ils davos 25 onns stadas nuninterruttamein commember A d'ina secziun dalla UCCP. Els obtegnan la medaglia d'honor, sch'els ein buca gia en possess d'ina tala.

Veteran

Veterans vegnan quels commembers che appartegnan silmeins 25 onns all'UCCP, ein stai zacu a catscha e compleneschan egl onn current il 60avel onn. Els obtegnan la medaglia d'honor dall'uniun cantunala, **ein denton buca libers dalla contribuziun annuala.**

Art. 8

Per commembers ch'ein sefatgs grondamein meritievels visavi la UCCP sa la Secziun da catschadurs Tödi far la proposta tier l'Uniun cantunala da catschadurs da patenta per las suandon-tas undrientschas.

- Distincziun da meret
- Distincziun da tgira
- Commember honorari cantunal
- Commember liber cantunal
- Veteran cantunal

V. Organisaziun

Art. 9

Organs

Ils organs dalla SCT ein

- a) la radunonza generala
- b) radunonzas extraordinarias
- c) la suprastonza
- d) ils revisurs da quen

Art.10

La radunonza generala

La radunonza generala ha liug mintg'onn il meins november ni baul el december. Igl onn da fatschenta croda ensemen cun la radunonza generala.

L'invitaziun alla radunonza generala inclus la gliesta da tractandas ein da tarmetter als commembers silmeins 15 dis avon la radunonza generala. Il medem vala per radunonzas extraordinarias. In cuort preavis duei vegnir publicaus avon la radunonza el FUS (Fegl official dalla Surselva).

- Tractandas dalla rad. generala**
01. Appel ed elecziun da dus dumbravuschs
 02. Approbaziun dalla gliesta da tractandas
 03. Prelecziun ed approbaziun dil protocol
 04. Rapport annual dil president
 05. Rendaquen, quen da tgira e rapport dils revisurs
 06. Rendaquen, quen annual e rapport dils revisurs
 07. Rapport annual dil cau da tgira
 08. Fixaziun dallas contribuziuns
 09. Mutaziuns
 10. Elecziuns: president
actuar
cassier
administratur da material
cau da tgira
revisurs da quen
 11. Elecziun dils delegai alla radunonza cantunala
 12. Program da lavur
 13. Honoraziuns
 14. Varia

Il commembers dalla suprastonza vegnan eligi per ina perioda d'uffeci da **dus onns**.

Las elecziuns vegnan fatgas aschia ch'il president, il cassier, il cau da material ed in revisur da quen vegnan eligi in onn dusp. Il ulteriurs commembers da suprastonza vegnan eligi in onn pèr.

Ein duront ina perioda d'uffeci singuls posts daventai vacants, vegnan tals remplazzai a caschun dalla proxima radunonza generala e valan per il rest da quella perioda.

Il president ed il cau da tgira ein delegai allas radunonzas dil DCC (statutas DCC). Els san vegnir remplazzai entras lur substituts.

Propostas da commembers per mauns dalla radunonza ein d'inoltrar en scret alla suprastonza silmeins 20 dis avon la radunonza

Sur propostas che figureschan buca sin la gliesta da tractandas sa la radunonza prender decisiun mo sch' igl absolut pli dils presents cun dretg da vuschar ein persuerter.

Art. 11

Suprastonza

Alla suprastonza appartegnan

- il president
- igl actuar
- il cassier
- igl administratur da material
- il cau da tgira

La suprastonza ei igl organ dalla SCT. Ella diregia tuttas fa-tschentas administrativas / organisatoricas dalla SCT.

Ella ei cumpetenta da decider sche silmeins 3 commembers ein presents. Ella sa decider sur d'expensas extraordinarias entochen 2000.- frs per onn.

La suprastonza ei deliberada dalla contribuziun annuala.

Pensums dalla suprastonza

Art. 12

President

Il president convochescha e presidiescha las sedutas dalla suprastonza e las radunonzas dalla SCT. El procura ch'ils conclus pri dallas radunonzas vegnien exequi. El survigilescha g'entir menaschi dalla SCT e representa quella, defendend ils interess dils catschadurs en tuttas situaziuns che se-presentan. El ei responsabels per tut ils cudischs vegls da protocols e da cassa sco era per tuttas correspondenzas da muntada.

Actuar

Igl actuar scriva ils protocols da tuttas radunonzas dalla SCT e dallas sedutas da suprastanza. El remplazza il president ed il cau da tgira en cass d'absenza.

El scriva e tarmetta las invitaziuns per tut las radunonzas dalla SCT.

Cassier

Il cassier procura il traffic da cassa ed administrescha la facultad dalla SCT. El fa igl incasso dallas contribuziuns. La distribuziun da tals ha da succeder ensemen cun l'invitaziun alla radunonza dalla primavera. El tarmetta a temps la gliesta da commembers e fa giu quen cul cassier central. Plinavon meina el ina exacta gliesta da tuts commembers. Sil pli tard 10 dis avon la radunonza generala metta el a disposiziun il quen als revisurs.

Administratur da material

Igl administratur da material ei responsabels per in bien manteniment da tut ils stabiliments dalla SCT sco era dil material e meina ina gliesta d'inventari che sto vegnir actualisada annualmein.

Igl administratur da material ei responsabels per il menaschi d'exercezi da tir durant la stad.

Cau da tgira

Il cau da tgira ei responsabels per in cuntinuau menaschi da tgira da biotop conform allas prescripziuns da tgira cantunalas e da nossa SCT. El procura per mauns dalla radunonza in rapport annual sur sias acziuns. En fatgs da tgira representa el la SCT anoviars. Il quen da tgira ch'el meina e survigilescha lai el reveder mintg'onn ils revisurs da quen dalla SCT. El presenta il quen da tgira alla radunonza generala. El ei responsabels per las starlieras e tut material cumpraus sur il quen da tgira. La gliesta d'inventari sto vegnir menada ed actualisada annualmein.

Revisurs

Ils revisurs han l'incumbensa da controllar il menaschi da finanzas dalla Secziun da catschadurs Tödi inclusiv la cassa da tgira. Els controlleschan quen e quittanzas e dattan da radunonza generala rapport a scret sur dils quens annuals. Ils revisurs fan las propostas per l'approbaziun dils quens e dattan scarica alla suprastanza.

In revisur substituescha il cassier en cass d'absenza.

VI Finanzas

Art. 13

Entradas

Las entradas dalla SCT consistan ord

- Contribuziuns annualas
- Tscheins da facultad
- Surpli ord activitads dall'uniun
- Bunamanas buca previdas

Expensas

Alla cassa vegn adossau

- Expensas dalla administraziun
- Expensas per promover igl interess dalla SCT
- Mussaments da condolientscha per commembers defuncts
- Expensas buca previdas

VII. Determinaziuns generalas

Art. 14

Suttascripziuns

La suttascripziun giuridica per la SCT han

- a) en fatgs d'administraziun: il president cugl actuar
- b) en fatgs da finanzas: il president cul cassier
- c) en fatgs da tgira: il president cul cau da tgira

VIII. Determinaziuns finalas

Art. 15

Revisiun dallas statutas

In revisiun totala ni parziala da questas statutas ei resalvada alla radunonza generala. Quella ei autorisada da decider sche tala ei publicada sin gliesta da tractandas. Per midar statutas ni singuls artechels drova ei igl absolut pli dallas vuschs dils commembers presents cun dretg da vuschar.

Soluziun dalla SCT

Art. 16

Soluziun

La soluziun dalla SCT sa succeder mo sch'il diember da commembers A sesminuescha sut 15 ed era lu mo sch' igl absolut pli dils commembers A restonts decidan da disolver la SCT. Quei duei denton succeder mo lu, sch'igl ei els proxims onns buca da quintar cun in carschament da commembers.

Tier ina soluziun dalla SCT croda gl'entir menaschi da facultad da cassa e protocols alla suprastanza centrala dalla UCCP per administraziun en vesta dad ina eventuala secziun nova. Tuts stabiliments dalla SCT crodan alla vischnaunca da Trun.


Vegn enteifer 20 onns fundau negina secziun da catschadurs sin territori dalla vischnaunca da Trun, croda la facultad alla uniu cantunala UCCP. **Il cudischs da protocols vegnan lu deponi egl archiv dalla vischnaunca da Trun.**

Questas statutas ein vegnidas approbadas dalla radunonza generala dils 4 d'uost 1992 ed approbadas entras la suprastanza centrala dalla UCCP. Ina emprema revisiun parziala ei succedida a caschun dalla radunonza generala dils 27 da november 2004. Ina secunda revisiun parziala, fatga sin fundament dalla revisiun dallas statutas dalla UCCP, ha giu liug a caschun dalla radunonza generala dils 22 da nov. 2013


Entrada en vigur

Las statutas revedidas passan en vigur cul datum dalla approbaziun entras la suprastanza centrala dalla UCCP

Trun, ils 11-4-2014 il president


Venanzi Nay

igl actuar


Marcus Albrecht

Approbaziun entras la suprastanza centrala

Tavau, ils 8.5.2014 il president


Beat Angerer

igl actuar


Hannes Parpan